

四庫全書

集部

欽定四庫全書

集部

明詩綜卷

五九  
六

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官主事臣陳墉

謄錄監生臣江軾

欽定四庫全書

明詩綜卷五十九

翰林院檢討朱彝尊編

朱國祚

五十八首

先公字兆隆號養淳秀水人以太醫院籍補順  
天府學生萬曆壬午中鄉試明年癸未賜進士  
第一人除翰林院修撰知起居注己丑充會試  
同考官辛卯典試江西歷司經局洗馬遷諭德

丁酉典試應天進右庶子戊戌以禮部右侍郎兼翰林院侍讀學士攝禮部尚書事壬寅轉吏部右侍郎引疾歸光宗即位起南京禮部尚書是年命入東閣加太子太保進文淵閣壬戌主會試尋以戶部尚書兼武英殿大學士加少傅

回籍卒贈太傅諡文恪有介石齋集

曹潔躬云吾鄉鉅公

若呂文懿項襄毅屠康僊朱文恪俱研心風雅而不與作者爭名文恪詩尤婉秀軒軒霞舉一無俗塵望而知其品之清也朱朗詰云先大父文懿公嘗過秀水文恪不出迎既升堂先公

意不憚詢之則文恪袍帶留質庫方今人取之  
歎息不置其清介如是詩亦非肉食人語正如  
水荷在壑冷香襲人陸麗京云易稱知幾詩  
詠明哲朱文恪足當之聞利瑪竇進異物公曰  
此輩小智足以惑人將來必有助之更歷法者  
景陵詩派初行公覽之驚曰安得此亡國之音  
吾不忍見之也知幾其神乎俞右吉云太傅  
清而能容簡而有大概忠著三朝無事不可為  
後世法即以詩論自行性情不事沿襲諸體俱  
合不失正始之音鍾廣漢云文恪處門戶紛  
爭之日中立不倚人所難能建儲事公私疏七  
十上其劾鄭國泰云本朝外戚不與政事冊立  
非國泰所宜言可云犯顏強諫不畏彊禦矣而  
吳人有先撥志始一編沒而不書則以公名不  
列東林之籍也尚得謂公非公是乎公與福清  
同年入翰苑同典試南畿晚歲同心輔政聞福

清初告歸中塗絕不會客獨過公譚讌三日然後行公贈詩有拙免書鈞黨衰猶詰典墳公蓋自安於无咎无譽矣公初不以詩名而同時浙右諸公未有過焉者 終天自云定陵中歲吾鄉朱文恪公業與臨胸馮文敏同被命入閣將宣麻矣沈閣老蛟門以密揭止之遂以少宰歸田使車粟杖偕同里郁伯承游天台雁蕩諸山吟詠不輟其詩率寫胸臆未嘗摹仿前人惜其集未刊行為鄉曲一老儒塗竄朱墨混淆難辨失其真矣

雩禱篇

朱鳥協上序蒼龍啓佳辰我后隆祀禮羣生潔明禋紺筵羅彩旒瑤圖吐文茵雲歌逐清漢鳳管徹蒼旻蘭羞

既云薦精誠亦已伸靈液以時敘而康億兆人

同葉給諫過鐵柱觀

有序

南昌鐵柱觀相傳為晉旌陽令許遜鎖蛟處按  
唐李白詩云浪動灌嬰井潯陽江上風豫章城

灌嬰所築疑此即灌嬰井也萬曆辛卯九月予

與葉給事典江西鄉試畢偕游是觀覽其遺跡  
證以李詩給事然予言爰賦詩十二韻以紀其

事

微瀾遠通江水黑照無影誰鎖戟尾蛟繚以千丈縵神  
州八柱外於此得塹穿地戶闢趙尊真靈位陶景人言  
毋支祁神禹昔鉗頸要當去民患不在遠方屏凍鐵斷  
繡花終古但嚴冷九派潯陽流有時風力猛潮生浪亦  
動疑是濯嬰井比於渴馬厓術可驗獠黷我言殊怪牒  
給事默心領請誦白也詩可以發深省

九日飲涵虛閣和葉進卿作

傑閣峙層霄來游屏鬱快晴臨山靄逼遠見宮雲敞天



氣日以清江光一何爽  
嘒嘒候雁鳴汎汎寒潮長  
登高循令序勝引屬吾黨  
甄藻協夙心繫桐得新賞  
絲飴乍出榼細菊且浮醖  
席移鳥遷樹坐久月承幌  
一唱白雪音滋我丹霞想

蘇州送君輿姪赴試北上

駕言勞舟發送爾出金閭  
游子將何之行行入帝鄉  
帝鄉日已近佳氣逾蒼蒼  
俯視碧水流仰看浮雲翔  
情隨水偕遠意逐雲俱長  
重寶抱璫璣殊材堪棟梁  
努力獻

文賦佇聽聲名揚

天台道中同郁伯承賦

游目覽層峯攜手攀高嶺舉步若登天畏塗復顧影喬  
柯聳白雲深壑陷丹井落日猶半規山色已先暝但愁  
寒虎嗥不嫌老鶴警忽聞下方鐘頓使千慮屏安得百  
丈崖繩以兩修綆

天台

人言天台高四萬八千丈中有瀑布泉飛流衆山響多

少采藥人石梁不得上我思斲壽藤削作過頭杖拄上

最高峰雲中一拊掌

俞右吉云王獻之能為一筆書陸探微能為一筆畫郭恕先能為一

筆風箏圖此詩雖五十言一氣融貫即謂之一筆也可

### 石鼓歌

橋門左右獵碣十形如古礎相排連窪中或與蒼白似  
抱質可敵瑤琨堅傳聞書自太史籀比於大篆尤瑰妍  
其辭典奧儻二雅彷彿吉日車攻篇周京遺製衆所信  
疑義莫定文成宣紛綸雖滋翟鄭議審視終異秦斤權

下逮宇文豈能爾齋堂所見母乃偏嗚呼神物不易覩  
三代舊跡稀流傳巫咸告辭熊相詛裕陵寶惜今棄捐  
比干銘折衛州壤穆滿書徙壇山巔會稽寔石字茫昧  
岫嶺祕跡文糾纏倚撫非乏好竒士千搜萬索無真詮  
詎若石鼓離復合陳倉入汴還留燕壇包席裹索駝背  
塵蒙露濯爪牛涎置諸太學始皇慶于今又歷二百年  
深檐五丈密蓋護不受長雨關風顛我來摩挲輒終日  
證以郭薛施潘箋凝思斷桐來自蜀叩之定有聲淵淵

文殘非因硬黃榻劃缺反撼鈎金填長廊無人起題壁  
回視落景崇黎懸

少年行

長安少年意氣豪雕鞍寶騎金錯刀呼盧百萬等土壤  
報讎一死輕鴻毛自言生為游俠子願輸肝膽酬知己  
此時未遇平原君且學鬪雞都市裏朝游紫陌黃金隄  
暮宿瓊樓桃李蹊探丸直向杜陵北挾彈頻過渭水西  
一聞邊警還投袂轉戰前收漠南地介子身封萬戶侯

嫖姚家賜千金第

瑣里行

海外大九州一稔一粟島嶼浮是何瑣里國治歷知春  
秋髣髴驗一綫鍼將子午求曾未識中夏帆從何處收  
虬鬚鵲眼顛其面海舶初來寄江甸巧將製器媚中涓  
自鳴鐘獻黃金殿吾思歷象由義和縱有歲差良不多  
豈容小邦定正朔倒置列宿成愆訛古來明王異物恒  
不貴遠人留之甚無謂況乎天官有禁祕不傳母俾此

輩奈我靈臺篇

雪

夜來千里雪曉起徧長安轉覺西山近宜從上苑看河  
冰難渡馬野艇盡投竿最苦東征士關門擊柝寒

經寧庶人廢苑和葉給諫韻

吳淠何知反劉安但自尊魚鹽時不利雞犬爾馬存俘  
已儒臣獲軍猶鎮國屯白頭遺父老尚說獻王孫

瀛洲亭新池

奪玉燕山石疏泉太液流采桑傳自李鑿井舊聞劉

李謂

大正劉  
大安也

浴烏牽萍起纖鱗撥荇游相看無限意落日且

淹留

杜門

杜門甘寂寞無事獨登臺白日旦復旦浮雲開未開幾  
聞鳩化眼孰藉鳩為媒只合還山夢輕帆一舸回

同周公瑕屠緯真俞羨長石湖玩月分賦得天字

今夜清秋月江橋一串懸樹深潛滴露水濶不分天滿



載官廚酒聽彈商女絃  
薄寒風漸緊主客未迴船

初夏過沈純甫穆湖村舍

逐臣歸嶺外近住穆湖村  
油菜齊抽甲珠藤不露根  
澆湯貓竹筍下酒鴨餛飩  
滿篋新詩卷曾無諫草存

新昌石佛寺

石佛何年寺空山麗相存  
一音不可說兩足此為尊  
雲起長迷路屋傾自作門  
篋輿下坡暝回首月明村

雨夜

黯黯浮雲色蕭蕭急雨聲人難今夜睡天慮此時傾茅  
屋牀牀漏菱池曲曲平愁心如曷旦不避暗風鳴

葉進卿出都訪予里第話舊三日臨行景德寺餞

別  
三首

自我辭京闕公今亦避賢一舟旋泛宅萬事且歸田西  
日雲仍蔽東溟海未填無由慰朝野把酒強陶然  
燒尾偕通籍揚眉共技文由來真臭味相逐比龍雲拙  
免書鈞黨衰猶話典墳相留三日醉離袂忍輕分

景德前朝寺經過路舊諳到門三貝塢負郭一龍潭別  
思花重驛離筵酒半酣平泉新草木須滿道山南

金銘寺訪秋潭上人

不遠金銘寺支公舊法堂鷓夷范蠡宅程史岳珂坊過  
雨花盈砌抽梢竹覆牆由來方外社主客意都忘

湖上

峯頭寶所塢湖上水仙王芳草年年綠風荷岸岸香  
鞦韆細雨對酒易斜陽不計重門遠瓜皮上小航

絲桐廬經釣臺下作

藥草仙人錄星文釣客槎祠開高下屋江溜淺深沙綠  
樹絲蠻鳥丹崖躑躅花誰歌竹如意懷古一長嗟

萬壽寺

貝葉三車少華鍾萬石餘聲仍到長樂地合置精廬瀟  
灑人王界莊嚴學士書秋來霜落後流響更何如

聞蟬

燕臺歇雨薦涼颼吹送蟬聲滿御墀清影不教塵外見

長吟先入禁中知上林氣暖枝堪託仙掌秋高露復滋  
撫罷五絃聽漸遠空庭疎樹午陰垂

西山謁景皇帝陵

戾園悽斷白楊風黃瓦今看天壽同北狩豈無通問使  
南城專賞奪門功若教守土盟城下安得蒙塵返域中

多少諫臣司耳目昌言翻賴校官忠

追復景皇帝謚號  
由荆門州儒學訓

導高瑤上  
疏言之

恭謁孝陵同葉進卿賦

夾道山松間石楠遙瞻暖翠鎖浮嵐靈龜玉殿十飛九

孝陵開穴時中有玉龜十其九飛去一存享殿馴鹿銀牌寸有三鍾山鹿千百為羣有懸銀

牌者高帝時所富牌約三寸第少豐碑撰方練陵無建文年碑悔多姦黨示

胡藍胡惟庸藍王之獄高皇暴其罪有昭示姦黨錄文皇帝後以目達文諸臣五雲縱護昌

平嶺佳氣須知兆自南

孝陵感革除事同葉進卿作

四年萬事革除休遜國遺蹤何處求事去金川門不閉  
心驚玉殿火初收空餘靈谷松千樹誰見文孫土一丘

未必西南到天末，魂歸終傍孝陵遊。

徐五修招游九峯三泖之勝，晚過斜塘賦此。

月落風微何處鐘，斜塘岸岸柳惺忪。  
疎星數點布棋局，宿鳥一羣衝釣舸。  
潮水漸生黃歇浦，野花齊放陸機茸。  
故人擬贈丹砂訣，商榷栖山第幾重。

天台道中

落月林梢一鵲飛，赤城霞已照征衣。  
水清幾曾鵝鴨鬧，屋小也有松筠圍。  
白葛花香眠鹿起，胡麻飯熟行人稀。

當年劉阮本俗物到此何心苦憶歸

自北雁蕩踰南雁蕩觀龍湫瀑布作

靈域苔堯隱不知中藏七十二峯竒披衣正在烟深處  
到面初無雨歇時謝客未曾經蠟屐貫休已後少題詩  
洞天只恨流傳晚莫覩蟲書鳥篆碑

謁定陵有感述

乞歸自放潞河船息偃江湖二十年往事句臚成夢寐  
重來弓劍莫攀緣要知孝為慈闈盡誰道恩從貴戚偏



猶記南宮封事入聽言終似轉圜然

自註國祚因請册立東宮劾及鄭國

秦先帝不之罪終如所請

恭謁慶陵作 二首

講幄頻趨鶴籞深重來就日慘棠陰十年始受東朝冊  
一月真傾下土心視權盡收中使節披沙罷採卍人金  
最愁日歷書難既龍去烏號涕不禁

枚卜纔宣三殿麻深宮遠晏五雲車翠微色映長陵樹  
金粟堆開景帝窪北去重關遮鳥道西來一水抱龍沙

白浮村下園官近未夏雕盤已薦瓜

頌歷恭紀

闔門開曉日玉律下雲邊一紀逢義馭千秋卜漢年靈  
臺占氣早上苑得春偏瑞靄含蕙英懽呼雜管絃三辰  
傳夏令萬國戴堯天欲進昇平頌慚無白雪篇

太學釋奠同郭美命行分獻禮畢周覽橋門石鼓  
歸途成二十韻

上丁遲日麗咸秩辟雍先釋奠周官禮安歌魯國絃質

明期敢後分獻典宜虔宿鳥初離樹殘星尚在天百夫  
趨陛戟萬舞列宮懸次第陳犧象從容執豆籩班居元  
老次位近素王偏十子升堂舊千春配享馬循階登降  
數薦帛節文全小大從于邁東西互折旋黃流纔灌地  
朱燎已生烟畢奏咸和曲徐收廣殿筵更衣辭鷺序散  
胙得羊肩坦步橋門外偕行獵碣邊形模度科白歲月  
味成宣已免風霜剝無愁鐘簋遷四詩雖絳漏終古自  
流傳坐久趨松日歸來並杏韉協恭良不易同調最相

憐好琢燕山石題名廟學孺

西勾橋口占

東雉村邊水西溝橋下流濯纓人不至處處浴沙鷗

裂帛湖上作

水淨一匹練山圍六扇屏春風纔幾日藥甲已先青

即景

秋風靡靡吹舟入蘆花裏相呼隔岸人聲墮半江水

逢破瓢道人吳少君

山人愛一瓢時時負肩背  
貽我巨勝花來自白羊隊

東魯道上作

汶水又一曲龜山知幾重  
從今冰上渡應少赤狐蹤

東朝侍直

二首

殿庭香靄接雲平一道爐函夾陛行  
肅肅講臣齊鵠立  
金蓮影裏喚先生

東華疎雨淨雰埃奪玉階平埽碧苔  
猶恐侍臣侵履濕  
宣從殿側左邊來

晚過天寧寺

郭外秋山百里晴日斜深院晚涼生十三層塔半扉影  
一鳥不來風鐸鳴

題白雲觀

一言止殺古人難多少逋臣藉爾安辛苦捐軀文信國  
得歸也擬著黃冠

夜泊淨業寺

僧樓佛火漾空潭李廣橋低積水含一夜朔風喧樹杪

薊門飛雨遍城南

西山湖上

芍藥關邊花氣收  
鷓鴣谷口斷雲浮  
倦游愛說江鄉事  
先試西湖一葉舟

卧佛寺

人傳蘭若春三月  
花比青彌陀院多  
惆悵芳時來獨後  
但聞風葉響杪羅

碧雲寺

銀榜高懸寶地賒  
游人只愛寺前花  
不知賈舶徵求盡  
舊鬼年年哭潞沙

秋入香山寺

山半松門度石梁  
流泉泱泱響僧廊  
置身著色屏風裏  
槲葉新紅柿子黃

洪光寺

石門幾曲轉丹梯  
圓殿僧同怖鴿棲  
指點游人下山路  
酒旗風颭夕陽西



夜宿鮑家寺

青豆房低結構牢長松靜夜卷秋濤  
分明一枕谿亭雨  
睡起不知山月高

中峯晚望

中官丙舍即花宮  
松柏林前梵磬風  
試上精廬高處望  
樓臺金碧夕陽中

摩訶菴觀杏花作

摩訶菴外袖吟鞭  
繁杏春開十里田  
曾與村翁舊相識

看花不費酒家錢

吳巨手云元時杏花齊化門外最繁東嶽廟石臺羣公賦詩張讌傳為盛

事葛邕祿易之詩云上東門外杏花開千樹紅雲遠石臺最憶奎章虞閣老白頭騎馬看花來至明城東花事衰郊西漸盛萬厯後摩訶菴杏花多至千株吾鄉朱太傅養淳詩云云承平之日翰苑風流後先一致也

祕魔厓

祕魔厓仄薛文斑千載盧師去不還遺有澄潭二龍子

日斜歸處雨連山

山牆圍作化人城榆柳陰濃信客行始信精廬風日好

秋深猶綠牡丹坪

劉應秋 一首

應秋字士和吉水人萬曆癸未賜進士第三授  
編修遷南京國子司業尋以右春坊右中允管  
司業事充日講官升洗馬歷諭德庶子以國子  
監祭酒致仕贈禮部侍郎謚文節有劉大司成

集

鄒爾瞻云公詩文雅  
容舒徐出入韓歐間

詩話文節儒臣非有言責而上書請東朝冠昏  
劫首輔彈中樞可謂古之遺直己其言有云近  
代論相多取諸詞林詞林雍容雅度一切齷齪  
猥瑣曾不闕其慮博而習于故靜而徹于幾能

以事外之身策事成敗則惟詞林勝矣寥寥  
數言其占地步不淺詩非所務無戾雅音

送林仰晉謫茶陵

夕郎抗疏出金扉萬里衡陽一雁飛  
世路何年遷客少聖朝今日諫書稀  
黃陵雨暗連青草嶽麓雲深濕翠微  
千載汨羅人不見寂寥心事更誰依

葉向高

四首

向高字進卿福清人萬曆癸未進士選庶吉士  
授編修歷官坊局南吏部侍郎召為禮部尚書

入直東閣以少傅予告再召為少師兼太子太師吏部尚書中極殿大學士卒贈太師謚文忠

### 有蒼霞草

詩話東林諸子奉福清為倫魁沙汰江河和調水火海內服其公忠歸田之日蘊藉風流銜左相之窪尊賄東山之碁墅詩品在山林臺閣之間諸體皆具

### 渡江即事

無嗟風土異已自邈關河村舍人煙少旗亭酒幔多春寒芳草歇天濶斷鴻過長路方茲始微名奈若何

送林客部南歸

幾年共逐帝京塵，此日那堪別恨新。  
畫省風流傳諫草，黃扉事業媿絲綸。  
故園載酒宜清晝，客路聽鶯屬暮春。  
君到里門應北望，長安猶有未歸人。

出關別江仲魚

心知惆悵對離觴，一望郵亭十里長。  
自與江郎黯然別，馬頭春草是他鄉。

題趙子昂明妃出塞圖

三千粉黛泣長門  
嫁得單于亦主恩  
貌取紅顏無限恨  
集賢學士宋王孫

周應賓 一首

應賓字嘉甫鄞縣人萬曆癸未進士改庶吉士  
除編修累官禮部尚書掌詹事加太子太保回  
籍卒謚文穆有月湖草

去婦詞

故人昨日新  
新人明日故  
同是機中人  
何必問繡素

岳元聲 一首

元聲字之初嘉興人萬曆癸未進士除旌德知縣改大名府教授轉國子監博士進監丞升工部主事歷員外郎中疏論首輔奪情落職起南京光祿少卿轉太常少卿再轉南太僕卿遷南兵部右侍郎進左侍郎有潛初子集

詩話侍郎立朝侃侃不阿里居有不平事弗避  
嫌怨力排衆議以歸於正所謂卿先生沒而可  
祭於社者集中韻語罕存寄弟一律曾以題扇  
者蓋本岑嘉州嬌歌急管雜清絲之作後驂鸞



錄登公集均失載殆不知  
者嫌其失黏而刪去之也

寄仲弟慶遠守爾律

梅花花信春應早楊柳柳州種定曾  
天邊白雨愁早濕瘴後黃茅苦鬱蒸  
秋風小鳥供行饌暗壑修蛇挂古藤  
驂鸞續錄聞初就可似吳船范致能

申用懋 一首

用懋字敬中長洲人萬曆癸未進士  
除刑部主事改補兵部歷員外郎中  
遷太僕少卿再遷南

京太常卿以右副都御史巡撫順天進尚書

薊門歸興

山河百二擁宸居亭障三千衛直廬要害直須勤版築

軍屯好在理耰耞

時議開復灤東漕河

東巡直據玄菟塞北望頻

傳白羽書自媿酬恩猶未得空留車馬賦歸與

姜應麟

一首

應麟字子文慈谿人萬曆癸未進士改庶吉士

授戶科給事中以建言謫廣昌典史遷餘干知

縣補龍溪起太僕少卿贈太常卿

秋懷

廿年投老此山丘倚杖閒看水獨流萬樹秋聲連斷峽  
一天涼雨過層樓因題楓葉開詩卷為訪蘆花上釣舟  
日靜衡門無剝啄忘機惟得伴沙鷗

鄒德溥 一首

德溥字汝光安福人萬曆癸未進士改庶吉士  
授編修歷中允洗馬卒于家以講官諭祭有雪

山草匍匐吟

雨霽聞蟬

西山一望隔簾櫳  
柳暗花明御苑東  
斷續蟬聲聽不盡  
夕陽人立小亭中

王 荳 一首

荳字季孺慈溪人萬曆癸未進士改庶吉士授  
編修

題青牛出關圖

柱下藏名久知希未足論知榮翻守辱體物必歸根一  
望真人氣應占大道存若為關令尹乞得五千言

徐應聘 一首

應聘字伯衡崑山人萬曆癸未進士改庶吉士  
授檢討歷大僕少卿

瀛洲亭對雨

秘閣清宵近蘭泉曲沼開宿烟生暮雨新水長秋苔地  
向蓬萊接波分太液來憑軒多爽氣疑在白雲隈

于若瀛

九首

若瀛字子步濟寧衛人萬曆癸未進士除戶部主事歷官右僉都御史巡撫陝西贈右副都御

史有弗告堂集

葉進卿云文若詩冷然超詣不襲世人片語而情景婉至跡象

可尋

王則之

云文若近體清曠秀倩出入開

元大厯之間

焦弱侯云念東詩不激而高不

刻而工雋永藏於溫醇纖穠寓之雅澹所稱治世之音非邪

詩話念東詩格未超然不屑作輒熟語

宿唐洞寺

野寺大道旁短垣倚雲嶠舍策叩禪關平蕪恣延眺暝  
色還荒徑明滅寒原燒篝燈坐幽室皎月來相照未稅  
塵鞅勞已窺靜者妙夜半風鳴條不減蘇門嘯

晚投清江浦

淮水吞江浦孤帆晚復開樹移沙岸轉波逆海潮迴人  
語迎村雜漁燈拂櫂來繫舟猶未穩寒漏已頻催

高郵湖

高郵初挂席波起蕩湖村遠水浮天白孤城過雨昏柳

條依岸斷鷗鳥向人翻破屋稀烟火滔滔銷客魂

再過清涼寺

再入清涼寺高臺覽舊都金陵猶王氣石壁自雄圖  
密樹依城合澄江入雨無六朝人事改瞻眺獨踟蹰

雨宿潼關

明燈虛館淒清夜細雨蕭蕭亂客腸秋入關門悲鼓角  
年來驛路老星霜家臨濟水菰蘆白壠接南山黍穀黃  
千里故園愁阻絕夢還京國亦他鄉

時寄家  
京邸



寄隱閣春興

小閣逶迤近水渠  
蕭條不讓野人居  
惟將藥裹供多病  
不為花飛憶敝廬  
懶散江邊清夢穩  
交游天上故人疎  
亦知衰晚甘淪棄  
世事浮雲任卷舒

舟中雜興

兩岸山相似舟移曲不妨  
回看京口盡落照下丹陽

清泉寺

滿谷西風椒葉稀  
穿林片片凍雲飛  
荒原車馬應無數

閒殺山僧坐翠微

金陵春

晴雲曉壓石城孤  
江樹江煙淡欲無  
南雪未消靈谷寺  
東風先綠莫愁湖

徐學聚一首

學聚字敬輿蘭谿人萬曆癸未進士除浮梁知縣調吉水擢禮科給事中出為山東提學副使歷福建布政使尋以右僉都御史巡撫福建贈

副都御史

阮霞嶼云敬輿詩文自出機軸為藝林推尚

詩話弘正以前實錄儲秘館薦紳罕得寓目此祝希哲九朝野記徐昌穀翦勝紀聞等書多齊東野人之語自華亭在政府抄有副本奔州見之故史料始得其實敬輿國朝典彙一編亦從實錄采摭者也詩亦尚聲格惜所傳不多

夜宿日觀峯禪房

岱宗面面削芙蓉時有卿雲出漢封  
杖屨中天干象緯  
風烟下界起蛟龍  
河流舊繞滄溟遠  
練影斜懸紫翠重  
夜半石牀天籟發  
夢中錯認景陽鐘

來三聘 二首

三聘字任卿蕭山人萬曆癸未進士除黃梅知縣調合肥入為兵部主事歷官江西右布政使

有祠部南舟豫章蜀游東游南華等稟

于念東云任卿

詩格律嚴整而一種恬淡之氣不減陶家風致

豫章夜雨

一月餘寒在高齋聽雨眠夜愁牽往事春夢入芳年才拙官何補家貧俸未捐遙憐鏡湖水重負杏花天

解悶

春風吹暖百花新  
院麴香浮竹葉春  
今日酒拚今日醉  
一年花老一年人  
浩歌聊借鶯為管  
醉卧何妨草作茵  
高興未闌天欲暮  
攜壺帶月問西鄰

何出光 一首

出光字兆文扶溝人萬曆癸未進士除曲沃知  
縣擢貴州道御史外轉太原知府京察謫寧州  
判官遷知樂陵完縣

次獲鹿簡井陘顧兵憲

孤城萬古控幽燕喬木殘碑不記年  
路入井陘分趙晉天開畿甸擁山川  
土門故傍封龍窟石邑猶存白鹿泉  
西北議和非上策使君此地好籌邊

王時濟一首

時濟字道甫稷山人萬曆癸未進士除戶部主事歷郎中終衛輝知府

登高丘

清林人跡稀  
我來何所翫  
坐看嶺上雲  
天風莫吹斷

虞淳熙 一首

淳熙字澹然  
錢塘人  
萬曆癸未進士  
授兵部職方主事  
遷主客員外郎  
改稽勲郎  
罷去  
有德園

集

景泰窪

合沓衆山轉  
鴻溝界危岡  
貞松心不移  
偃蓋覆神堂  
欲蛻龍為魚  
千古以慨慷  
土木骨縱橫  
魂來關塞長  
君王

奠鼇足太史筮苞桑宗廟救倫喪朱火寒有光迎駕誼  
何篤覆轍戒難忘豈無延陵心重為亡國傷宮門一以  
奪羨門竟迷方碧瓦易黃屋蓬顛西山傍杜宇啼舊痕  
織鳥集野棠坤維幸勿絕一窪得新藏雲表扶九宮何  
必厥陰房碧血障邊塵芊芊白草芳迢迢西湖畔少保墓  
道荒君臣祀一體千里同白楊高睇歌大招涕泗灑衣  
裳

茅國縉 一首



國縉字薦卿歸安人萬曆癸未進士除章丘知縣入為廣東道御史謫知浙川遷南工部主事歷郎中有菽園詩草

過白門酬拙之贈別

孤帆渺渺指江汀飛盡楊花柳尚青此去不堪頻北望  
愁邊風雨滿新亭

莊履朋 一首

履朋字中益晉江人萬曆癸未進士官戶部主

事

別林尉

桑梓勤吾念憑君破寂寥  
自今花下吏日折道傷腰  
象郡風煙隔龍城瘴氣消  
行春聊佐令亦足採歌謠

張壽朋

三首

壽朋字冲和號西江南城人萬曆癸未進士除  
刑部主事謫泰安州同知終廬州府通判有深

息窩集

狂歌

夷門老侯生刎頸送公子此義豈不高感人安用死毛  
薛亦風流諷言何婉美信陵賴相成歸國見終始身隱  
世隨棄無復關人理悲哉豪俠流大道所不齒

西湖憩胡氏亭

中庭遙相望斗室更臨水云有賣藥人十年身已死柴  
扉苦長扃我到為之啓鳥跡半幽牕蛛絲橫斷几花殘  
沒階前竹亂生屋裏村婦持帚來掃除亦堪喜破簷補

荻簾新火燒楓子可以坐老狂開尊炙枯鯉夕陽何處  
歸大醉且閒止

翠屏房

江漁釣罷無市野寺殘僧似村鉏圃須留行路愛山莫  
掩柴門

湯顯祖 九首

顯祖字義仍臨川人萬曆癸未進士除南太常  
博士遷南禮部主事謫徐聞典史量移知遂昌

縣有玉茗堂集

詩話義仍填詞妙絕一時語雖新新源實出於  
關馬鄭白其壯丹亭曲本尤極情擊人或勸之  
講學笑答曰諸公所講者性僕所言者情也世  
或相傳云刺曇陽子而作然太倉相君寔先令  
家樂演之且云吾老年人近頗為此曲惆悵假  
令人言可信相君雖盛德有容必不反演之於  
家也當日婁江女子俞二孃酷嗜其詞斷腸而  
死故義仍作詩哀之云畫燭搖金閣真珠泣繡  
牕如何傷此曲偏只在婁江又七夕荅友詩云  
玉茗堂開春翠屏新詞傳唱牡丹亭傷心拍遍  
無人會自拍檀痕教小伶其後又續成紫簫殘  
本身後為仲子聞遠焚棄詩終牽率非其所長

宿浴日亭因出小浪望海

為郎傍星紀江湖常久居倏忽過南海片帆挂扶胥隱  
隱岸門青杳杳天池虛培塿澹凌歷氣脈流紆徐潮迴  
小洲渚龍鱗勒溝渠於中藏小舟其外懸日車雲影蒼  
梧來咸池相卷舒孟冬猶星河淡月沾人裾陰陽盪揮  
霍精色隱踟躕濯足章丘餘沐髮扶桑初濤輝臨侑盤  
若木鮮芙蓉西顧連崦嵫東眺極扶餘小浪亦莞爾大  
波始愁予嶼舶自吞吐樓櫓成烟墟飛金出熒火明珠  
落鯨魚吾生非賈胡萬里握靈糈晡羅浮外傳聞仙

所廬玉樹如冬青瑤芝若栴檀陽烏不日浴晝夜更扶  
輿丹穴亦不炎好風常相噓白水月之津一飲饑渴除  
徐問汝仙尉去此將焉如

達奚司空立南海王廟門外

司空暹羅人面手黑如漆華風一來覲登觀稍游逸戲  
向扶胥口樹兩波羅密欲表身後竒願此得成實樹畢  
顧歸舟冥然忽相失虎門亦不遠決撇去何疾身家隔  
胡漢孤生長此畢猶復盼舟影左手翳西日嗔胷帶中

裂啣龍氣噴溢立死不肯僵目如望家室塑手一何似  
光景時時出墟人遞香火陰風吹峯律上有南海王長  
此波臣秩幽情自相附遊魂知幾驛至今波羅樹依依  
兩蒙密波聲林影外簷廊暝蕭瑟

麗水風雨下船棘口有懷

石城雙水門落日遠江介春潮風雨飛暮寒洲渚帶流  
雲蒼翠裏緒風簫鼓外分披悟曾裂合沓迷新屆宿霧  
緬餘丘生洲隱遙派地脈有虧成物色故明昧曲折神



易傷幽清境難會江花莞流放岸草悽行邁不見林中  
人自撫孤琴對

送楊安入太原軍

星使三河外春王二月初風雲臨上黨花鳥入昭餘關  
近茄聲急川遙騎影虛世途君自見長嘯欲何如

偶成

雁影金河盡梅花玉管催江南望春色獨上鳳皇臺

浪石灘

潮濕涇陽暮風鳴浪石寒鷗鷺飛不起橫過釣絲灘  
恩平中火

海氣層雲盡山烟遠燒浮孤臣隨早晚一飯是恩州  
覲回宿龍潭

是歲春連雪烟花思不堪雨中雙燕子今夕是江南  
臨江樓聞越舸且別悵然

亂帆秋影半江樓燕語滄涼傷客舟便去揚州且明日  
故鄉今夜有人留

姚思仁 一首

思仁字善長秀水人萬曆癸未進士除行人選  
江西道御史巡按山東河南升通政司參議大  
理少卿應天府尹入為通政使轉工部右侍郎  
歷尚書太子太傅有萊竹堂遺橐

詩話肅皇帝信薊州人李昇嵩縣人刁騰之言  
分遣中貴崔閔主事沈應乾千戶仝爵李鉉至  
其地相視銀礦是時遼東衛軍姜賢亦奏開蓋  
州歸州之礦遂以賢為礦長至萬曆間陳開礦  
之利者紛紛於是中貴四出海內騷然姚公為  
巡按仿鄭俠流民圖撰開采圖說進呈力請罷

役不聽既而開礦者爭相仇殺羣盜竄起畿甸則齊本數李庸史籍周言張世才石賓河南則張住朱世安趙仲保蘭一枝王西安山西則張守清郭貴三張盡忠許廷珍寧夏則楊戩本欲利國而國幾危矣公嘗注律以律文簡而易晦乃用小字釋其下

本朝頒行大清律實依公所注本也公居鄉學尊為善年九十一考終余幼時猶及見之

嘉祥曾子祠

新祠結構澗之阿問俗年來向此過大勇萬人吾往矣  
傳心一貫道靡他狸迴殘夢遺琴失爪種先疇舊跡訛  
自是聖朝崇典祀每聞金石奏安歌

盛萬年 一首

萬年字恭伯秀水人萬歷癸未進士除刑部主事歷工部郎中出為福建按察副使歷廣東貴州江西按察使遷雲南布政使未任卒有拙政

編附詩

詩話盛公浮湛藩屏數歷有年當其司臬羊城值倭人入寇躬擐介冑乘城擊破之於錦囊所嘗以一人攝五監司事案無留牘其還家詩云三黜已甘投嶺外一帆今喜到江鄉所居梅湖饒有魚稻之利菜場納稼專以實書訓子孫先疇至今未有改云

右江謠

昭江濫濫連邕管千厓赭碧清霜滿竹雞格格啼榕林  
修蛇毒霧愁浸淫鳥言卉服繡項渠荒茅叢菁山頭居  
時平莫負蕙芻弩夜雨叢祠賽銅鼓

殷都一首

都字無美蘇州嘉定人萬曆癸未進士除廾陵  
知州入為兵部員外歷郎中調南刑部京察去

官

離資園

蘭生在深谷寧畏惡草滋受性偶不同托根從所宜夙  
齡負耿介中路遭嶮巖棄置纓與綫歸來尋故蹊南山  
荒豆田東陵沒瓜畦躑躅不自得為園且栖遲上有護  
草堂下有春草池光風旦夕至引觴以為怡蘭者自為  
蘭資者自為資達觀詎離俗全生甘息機寄言謝人徒  
殊調勿見疑

詩話無美藉甚詩名而遺集罕傳離資園一篇  
為王元美作也園在州治鸚哥橋東有山有池

亭曰壺隱曰晞髮軒曰鷄適室曰碧浪曰  
小憩後池曰芙蓉沼元美嘗自為作記

明詩綜卷五十九



欽定四庫全書

明詩綜卷六十

翰林院檢討朱彝尊編

黃居中一首

居中字明立晉江人萬曆乙酉舉人自上海教

諭遷南京國子監丞有千頃齋集

靜志居詩話監丞銳意藏書手自抄撮仲子虞  
稷繼之歲增月益太倉之米五升文館之燭一  
挺曉夜孜孜不廢讎勘著錄凡八萬冊  
墳土未乾皆歸他人插架深可惋惜也

寄兒

愛子遙相送臨歧轉憶家囊空嗟久客歲晏又天涯鬢  
逐風塵短心驚道路賒離情兼旅思一倍惜年華

曾仕鑑一首

仕鑑字人倩南海人萬曆乙酉舉人歷官戶部  
主事有慶厯公車二集

游羅浮

石室春同入龍宮夜不眠青天雙瀑下明月二樓懸羽

蓋悲陳迹金書憶昔年相攜采芝叟勸酒鐵橋邊

吳大纘 一首

大纘字于孝義烏人萬曆乙酉以官生中順天鄉試

齋居感興

蒼蚪九重淵玄豹七日霧欲以媚幽姿非為傲睨故驛  
請疲風塵夙夜謂多露廣游可成名無乃喪真素

陳邦訓 一首

邦訓字彝父鄞縣人萬歷乙酉中順天鄉試被  
黜後署海鹽儒學教諭官至漳州通判有玄感

軒集

閣上

雲合沙頭樹人歸浦口烟空山暄宿鳥小閣俯長川衣  
短宜殘暑歌長入遠天南風吹几席不飲亦陶然

唐文獻

五首

文獻字元徵松江華亭人萬歷丙戌賜進士第

一授翰林脩撰歷中允諭德右右庶子掌詹事  
升禮部侍郎翰林院學士教習庶吉士卒贈尚

書加太子少保謚文恪有占星堂集

詩話郭文毅坐妖書被逮人莫敢前文恪周旋  
患難不避危機當時稱為長者其治家整肅嘗  
患江南子弟無家法貽書告誠二子長諱允恭  
字欽甫即彝尊之外祖也仕兩浙鹽運司副運  
石屏知州家藏殿試策神宗御題卷面瘦硬通  
神曾捧觀于占星堂上占星堂者文恪未第日  
人或見奎宿於堂於是徐奉化獻忠作記孫漢  
陽克弘以八分書於門屏亂離尚存今已易主矣

長安春日感懷

已覺吾良久行藏未自由江鄉千里思夢醒五更愁烏  
自吟清晝花應笑白頭初衣頻取拭肯負竹林游

丁酉秋得請賜告

天意容棲遁烟霞入夢長淺才羞竊祿漸老學休糧戢  
羽歸愚谷看人角智囊單車明日遠相似鴈隨陽

寄施起東丈為溧陽司訓

舊是文章伯居然弟子師絳紗傳舊業綠綬縮明時君  
有施讎易吾慙唐勒詞空懷問竒意未敢問前期

登北固曉望

清晨凌曲磴一望攬雄圖  
天塹仍連楚雲帆半入吳遠  
山籠日氣古寺隔烟蕪  
自覺登臨迴渾忘旅思孤

夜泊呂城

何處汀洲晚停橈信楫師  
雨餘霞散綺風靜柳垂絲  
野寺鐘聲後夜潮人語時  
勞勞遊子意隴笛不堪吹

楊道賓

二首

道賓字惟彥晉江人萬曆丙戌賜進士第二授

編修累官禮部左侍郎兼翰林院學士贈尚書

謚文恪有集

何稚孝云公詩優柔悅  
澤而出之以鏗然之韻

梧江即事

春水萬山低江城宿霧迷征帆天上下去路粵東西荒  
逕餘亭障樓船急鼓鞞客心驚寂寞况復夜猿啼

別徐尉之任廣昌

遺愛苕溪上新綸楚水邊人疑徐孺子尉即漢神仙柳  
色憐分袂春風動別筵當官三事在慎勿負先賢



薛三才 一首

三才字仲孺鄞縣人萬曆丙戌進士改庶吉士  
授兵科給事中累官兵部尚書贈太子太保謚  
恭敏有集

春暮花園卽事

退食閒亭自委蛇憑軒忽漫問花期韶光已過九十日  
闌藥纔舒三兩枝乍和酒香風細細長畱春色景遲遲  
看來最是牽情處孌娜晴絲百尺垂

黃汝良 一首

汝良字明起晉江人萬曆丙戌進士改庶吉士  
授編修歷官太子太傅禮部尚書掌詹事府事

有河干集

登樓作

一卧滄江十二秋  
今辰獨上望京樓  
邊城幾處臨風嘯  
關塞何人裂土侯  
萬里難傳青海信  
千峰不散白雲愁  
孤臣有淚向誰灑  
敢道歸田便得休

表宗道 二首

宗道字伯修公安人萬曆丙戌進士改庶吉士授編修歷中允洗馬庶子贈禮部右侍郎有白

蘇齋集

詩話嘉靖七子之派徐文長欲以李長吉體變之不能也湯養仍欲以尤蕭范陸體變之亦不能也王百穀王承父屠長卿雖迭有違言然寡不敵衆自袁伯修出服習香山眉山之結撰首以白蘇名齋既華其源中郎小修繼之益揚其波由是公安流派盛行然白蘇各有神采顧乃顛波自放舍其高深專尚鄙俚鍾譚從而再變臬音馱舌風雅蕩然泗鼎將沈魑魅齊見言作

備者孰謂非  
伯修也邪

### 攜尊江上

郭外同君去清尊對水涯  
寒潮鳴草徑積雪晃平沙  
小艇乘流急人家逐岸斜  
流連歸路晚高柳亂啼鴉

### 兩岸芙蓉

南垞與北垞岸遠渺難即  
此處好行舟面面芙蓉色

吳應賓 二首

應賓字尚之又字客卿桐城人萬曆丙戌進士

改庶吉士授編修天啟初以理學名不赴加左  
春坊右諭德兼翰林侍讀門人私謚宗一先生  
有學易齋集

感興

雨氣澹將夕木末明殘霞流芳惜餘姿宛轉歸泥沙物  
化一以遷歡樂為咨嗟根株既不定無乃空中華渺然  
念獨往浩蕩隨無涯

題張洪陽閒雲館

賦就張平子飄然獨草亭回環一水綠高下萬山青避  
世曾金馬焚香對石屏祇疑雲霧窟長護太玄經

王士昌 五首

士昌字永叔臨海人萬厯丙戌進士厯官右僉  
都御史巡撫福建有投荒草

出都

八口家同在提攜出國門艱危心未剖慷慨舌猶存戀  
闕原臣志投荒亦主恩長沙憐謫所不敢賦招魂

三義廟

遺像丹青蝕英名過客聞中原曾百戰大業竟三分旗  
影搖山月爐烟結水雲恰逢邨社近盲鼓說遺文

武陵縣

武陵城北道十里接平疇沙際餘寒斂湖陰積氣浮叢  
篁編作戶獨木剡為舟指點仙源近清溪分外幽

黔中雜詠

南服天垂盡銅標向此分洞中厖吠日天半犢耕雲蠻

語逢人譯夷歌到處聞  
干戈新戰後殘照幾家邨

分宜道中

野菊花黃楓葉丹  
衝寒日日據征鞍  
擔囊行旅休相訝  
蠻尉於今屬漢官

李啓美 一首

啓美字成甫一字念方豐城人萬歷丙戌進士

改庶吉士授檢討有李太史集

吳會甫云誦念方詩如野寺孤

鍾令人塵

襟頓滌



送王則之假歸

千里一相送，郊雲黯不飛。  
潼關何處是，孤鴈獨西歸。  
柳暗秦川失，天高隴樹微。  
如何向岐路，春草正芳菲。

黃承玄 一首

承玄字履常，秀水人。萬曆丙戌進士，除工部主事。歷員外郎，中出為湖廣參政，調山東，再補江西，進按察使。遷河南、陝西、左右布政使，升應天府尹。以右副都御史巡撫福建，贈工部左侍郎。

有盟鷗堂集

江上送陸伯生東歸

瓜步洲前歸思濃  
金焦忽送五更鐘  
一帆羨爾乘潮去  
數遍吳山到五茸

王嘉謨

五首

嘉謨字伯俞直隸豹韜衛人萬曆丙戌進士除  
行人選禮科給事中官至按察使

畿輔詩存  
作布政使

薊丘集

詩話伯俞五言頗熟選體第北人用  
韻恒以入聲雜上去讀故不多存

### 述懷

脈脈泉初生粼粼冰始泮嘯歌念古人俯仰成愁歎  
賤本無方乘時若有判草木滿中唐昔鷓巢其岸本欲  
慕崇高迺為耳目翫

### 嵯兒橋

淵淵溪水中青蒲葉靡靡翳然林木間幽懷信予美  
細藻唼潛鱗山梁雝文雉尋幽復遠涉濟勝良堪喜夕陽

忽西流平湖澹烟起慷慨賦新詩行歌出山市

西勾橋

微風何澹澹宿雨隨人飛遙望石梁前楊柳蔭重圍淵  
壑寂無聲獨行向霏微寒芳自可藉寄賞幸不違徙倚  
豐林間坦步徐言歸

盤山法藏寺

折坂殿懸厓悠然縱鞍鞵絲絲谷口雲飄墮白如練峰  
巒忽相冒竒石還驚眩大者數十尋小或等冠弁峰巔

有嵌宇歷歷皆可見永懷僧棲樂倍覺塵情倦  
稀逢采芝侶獨立幾回盼

雙峯寺

遠眺翠微近雲木澹清姿石華浮半空飛泉激流澌其  
陽饒怪石小大紛參差萬嶺鬱相錯孤雲停不移中峰  
構翠龕一一能仁祠山僧衣蘿薜雜以松蘚皮導我磨  
蒼崖覽古生遐思

沈瓚 三首

瓚字孝通一字子勺吳江人萬曆丙戌進士除

南京刑部主事歷郎中出為江西按察僉事告

歸起補廣東僉事有靜暉堂集

李伯遠云子勺詩格蒼以古致

沖以遠高者何減魏晉次亦不失為陳射洪

詩話子勺兄璟妙解音律撰南曲譜鄉里目為詞隱先生居家未嘗廢絲竹有子恒失學子勺去官身為塾師教其兄子一門之內一選伎微聲一尋章索句論者比之顧東橋兄弟云

### 游元陽洞

朝雲漸歸山松風晝淒緊重巒散晴暉皎日麗阡畛矚

嶺目俱遙循巖步方窟一山別作阿亂石聚成困徑穿  
斧斤餘崖覆松蘿盡危磴曲緣澗近坡平中準洞啓石  
谿砮風高樹凌躋僧舍密綴蜂樵柯露棲隼居人茂花  
竹過客甘蔬筍迴思廿載前此地名跡泯七日鑿混沌  
一朝見玄北境闢地孕靈氣開人示朕幽夢屢相關孤  
筇自茲引為誦郝生言無貽謝公哂

山中雨行夜宿民家

好鳥知農候嚶嚶灌木間荒村無堠館樵斧出柴闕雨

暗車前路雲埋屋後山  
虛疑檐溜急溪水夜潺湲

立秋日送行

石頭城下路三面是長江  
此地新秋色映君江上艤涼  
風動衣袂飛雨灑船牕  
無事嗟行役臨流倒玉缸

潘大復 二首

大復字徵復烏程人尚書季馴子萬歷丙戌進士  
工部郎中有毘山堂詩草

同朱文寧庶常觀海



烟波杳無際縱目喜同君雲外千峯出潮平各浦分競  
探蝴蝶窟驚起鷺鷥羣浮白宜茲地蕭蕭日就曛

江行阻風得來字

孤舟泊風雨日夜聽喧飀石燕排空至江豚鼓浪來人  
家少煙火田畝半蒿萊愁緒那堪破呼童發舊醅

徐 燭 十九首

燭字惟和閩縣人萬厯戊子舉人有幔亭集

張幼

于云惟和調匪偏長體必兼善力追古則盡滌  
時趨謝在杭云惟和才情聲調伯仲季迪

送人游吳楚

津亭煙柳綠垂絲萬里關山匹馬遲去國正當秋盡後  
登樓多在日斜時楚江草長悲鸚鵡吳苑花深走麋鹿  
話訊何須共惆悵秋風搖落是歸期

旅次石頭岸

石頭城下水微茫回首鄉關驛路長瓜步煙波連斷靄  
秦淮雲樹隔斜陽秋高落木迷村舍夜靜寒潮到女牆  
客裏愁心已如此一聞南雁更淒涼

金陵故宮

先朝遺殿閉塵埃零落空勞過客哀  
五夜銅壺乾罷滴六宮金鎖澀難開  
翠華去後全無影羅綺焚餘尚有灰  
弓劍盡埋烟雨冷椒房一半上蒼苔

金陵懷古

白門京闕舊山川朱雀烏衣夕照邊  
百代荒陵崩夜雨六朝遺殿鎖秋烟  
脂歲久銷宮井苔蘚春深繡御筵  
往事淒涼無限淚傷心最是建文年

閩王審知墓下作

玉輦何年去不回  
霸圖千古總成灰  
秋深兔穴依寒壑  
歲久魚燈暗夜臺  
故國關河甌越在  
遺民蘋藻鼎湖哀  
蓮花峰下黃昏月  
猶見三郎白馬來

送邵武李太守擢憲滇南

昆明池水靜無波  
擁傳新從韃道過  
開府定能寬漢法  
采詩曾不廢蠻歌  
越墟滇客龍名市  
納款蠻王象渡河  
他日勒功留片碣  
點蒼如黛石差栽

送王玉生

作客生涯薄，依人去住難。  
春光無限好，空向異鄉看。

客中寒食

去歲燕山道，今朝劔水濱。  
如何兩寒食，俱作異鄉人。

漂母祠

落落千金報，悠悠國士心。  
從今慙漂母，不敢過淮陰。

彭城懷古

雲龍山下鳥爭啼，戲馬臺前日欲西。  
莫謂楚宮今寂寞。

王孫芳草正萋萋

客中贈別

吳姬把酒唱離歌  
一片愁心奈別何  
莫怪相看頻下淚  
江南春色已無多

丹陽遇陳十八

丹陽渡口遇同鄉  
欲語匆匆怨夕陽  
君返江南我江北  
雲山千疊斷人腸

郵亭殘花

征途微雨動春寒  
片片飛花馬上殘  
試問亭前來往客  
幾人花在故園看

酒店逢李大

偶向新豐市裏過  
故人尊酒共悲歌  
十年別淚知多少  
不道相逢淚更多

元夕懷李伯賢

往事傷心倍可憐  
故人今夜渺雲天  
燈光月色鞦韆影  
已隔春風二十年

送李子行太守謫茶陵

一官何事又投荒  
楚峽猿聲幾斷腸  
正是長沙遷謫地  
不堪夜雨渡瀟湘

芋江驛樓送張四之白下

春風吹柳萬條斜  
此去金陵驛路賒  
不必相思當後夜  
片帆開處即天涯

交河道中

黃沙漠漠馬驂驪  
北地春光久自諳  
不用塞帷縱遊目



斷無山色似江南

村中晚步

青山迴合抱清溪  
村徑陰陰鳥自啼  
落盡疎林秋色晚  
水流楓葉過橋西

張文柱二首

文柱字仲立崑山人士  
淪子萬歷戌子舉人臨

清知州

朱秉器云仲立詩清逸然多羈柘咨歎之語  
孫齊之云仲立高才燦發託意

幽玄正如水壺秋月本宜著烟霞外  
迺強使適俗故少年即有憂生之嗟

塞下曲

有鴈逐歸心無書迓上林天山風不斷秋早雪花深白  
草分秦甸清笳雜漢音將軍誇戰馬價重一千金

惜別

惜別復惜別殘更為爾遙青楓薄命葉黃柳斷腸條天  
迴遲寒鴈江空急暮潮秣陵烟雨際畱得鬢蕭蕭

李鼎一首

鼎字長卿新建人萬曆戊子順天舉人有李長

夜泊桃源

迢遞憐行役其如客思何孤雲將短檝十月渡黃河水  
泊蕪鷗宿霜清聽雁過更堪寒夜盡歌枕遠鐘多

塗中雜詩

一騎風塵裏千山縣郭東畏途逢落日別思對孤鴻仗  
策心逾遠談詩氣更雄驅馳丈夫事不必恨飄蓬

高攀龍

二十二首

攀龍字雲從無錫人萬曆己丑進士除行人謫

揭陽典史起光祿寺丞歷官刑部侍郎都察院  
左都御史坐忤逆閹削籍被逮赴水死贈太子

少保兵部尚書謚忠憲有高景逸詩

陳皇士云先生詩無

意求工大約忤

寫自得之志

詩話先生天下規矩授世翼教不以聲律自繩然與歸待詔訂金石契宜同心之言自成蘭臭

### 水居

薄暮登樓四望遠疇時雨既降農人乍休乳燕未止儵  
魚出游萬族有樂吾亦何憂

卿集

寄題故園

三徑荒蕪久頻來入夢思  
空傳竹醉日不見柳眠時  
石室藏雲滿山花帶露滋  
到家開北牖觸目是新詩

陶望齡

四首

望齡字周望會稽人萬曆己丑賜進士第三授翰林編修歷中允諭德遷國子祭酒卒謚文簡

有水天閣歇菴二集

黃貞父云陶子詩為  
韋為柳間似長吉

詩話周望早年詩格清越超超似神仙中人中  
歲講學逃禪兼感公安之論遂變為去夫蕘豎  
面目白沙在泥與  
之俱黑良可惜也

旅次憶越中舊居

宴坐雲歸後開尊月上初春衫裁越布晚食飽溪魚白  
鶴仙人箭玄夷使者書故鄉真可樂不是愛逃虛

送商叔護朱叔懋應試秣陵

仗劍他鄉意彈冠故友情秋風待行客落日事孤征尊  
酒遠相命寸心言未傾思君似流水寄向石頭城

靜坐吟

我愛山中坐恍若羲皇時青松影寂寂白雲出遲遲獸窟有浚谷鳥棲無卑枝萬物得所止人豈不如之耕巖飲谷水常得中心怡

夏日閒居

長夏此靜坐終日無一言問君何所為無事心自閒細雨漁舟歸兒童喧樹間北風忽南來落日在遠山顧此有好懷酌酒遂陶然池中鷗飛去兩兩復來還

湖上閒居季思子往適至

正爾山水間念吾烟霞友春風吹微波日暮倚楊柳我  
友惠然至童僕喜奔走相別歎幾時相逢慮非久所歡  
得晤言欲言仍無有默默各自怡一室閒相偶夜深不  
能寐明月在東牖

七哀詩

肅肅秋風深漫漫秋夜長中夜百感集攝衣步空堂俯  
聽蟲聲悲仰視明月光物色一如昨舊人何茫茫歲月



日以疎髣髴日以亡一朝成永訣千載空相望靜心易  
生哀遺情難為方願從夢中路抽身至其旁

諸公招飲石城隴

勝會寧可常勿惜此淹畱竹樹有嘉蔭班坐無俗流念  
我平居日所愛在山丘願得素心侶引杯相勸酬今晨  
愜幽興不醉將焉求未須敕太康此樂可忘憂卓哉斜  
川人千載心悠悠

夜步

幽人夜未眠  
月出每孤往  
繁林亂螢照  
村屋人語響  
宿鳥時一鳴  
草徑露微上  
欣然意有會  
無與共此賞  
千載懷同心  
陶公調可仿

潮陽縣觀海

仲尼欲乘桴  
吾亦來海濱  
不作放逐客  
誰能得閒身  
澹風日和蕩  
滌怡心神  
一笑萬象間  
偃仰得其真  
快哉此日樂  
可以擬千春  
逝者只如斯  
世事徒繽紛  
安得無家累  
終焉此垂綸

魯兩生

吾愛魯兩生面折叔孫子灑然揮之去身隱名不紀是  
時風雲際豈不願膺仕大道吾所聞曲學有深恥從此  
謝世人聊以保厥美

登子陵釣臺

西京亂有象佛士鬱不揚鄙哉通津子奄奄孔與張謙  
默祇自衛貞剛乃銷亡士氣日凋喪國勢遂不强為彼  
蝨賊資其心實先傷卓卓嚴子陵抗志輕侯王辭榮去

上國垂釣來崇岡高風一以振芳躅久愈昌迺知姱修  
士與世為隄防

登華頂峯遂至石梁斷崖觀瀑布

晨策凌絕頂夕棲入浚谷攢峯插天表飛瀑掀地軸  
險驚前賞升虛騁極目春風澹冲襟朝曦扇輕燠深  
桃點澗紅弱柳抱溪綠想見桃源人胡麻飯應熟仙  
不可期念此媚幽獨

跋光靜坐

二首

偶來山中坐兀兀  
泱旬餘澹然心無事  
宛若生民初流  
泉當几席衆山立  
庭除高樹依巖秀  
修篁夾路踈所至  
得心賞終日忻忻  
如流光易蹉跎此日良不虛  
寄言繕性者速駕深山居

落日在平野悵然懷千秋  
緬彼臨安區當年棲王侯  
樓臺何鬱鬱冠蓋紛相酬  
一朝世事盡百代成荒丘  
徒存指點跡令人心悲憂  
何如蓬廬士偃息巖壑幽  
圖書共朝夕花木遮春秋  
觴酌洽朋好卧起親鳧鷗  
豈不念世

故中心自有求生有無窮娛既沒名長留

始歸

三旬通仕籍六旬始歸田中間立朝日未嘗淹三年拙  
宦分自定遯世性所便每懷五湖志願棲一壑堅飛鳥  
脫籠中游魚歸故淵豈誠異時好所好各有專驅逐車  
馬塵何如松菊間晨起日三商夜坐月一天靜默契神  
理夷猶翫簡編所務願不違至人樂已全

題歐陽宜諸素風堂

春風動庭草陳根坼新萌元化一以暢而我寧自縈浩  
浩發情志悠悠念羣生物生自有涯秉心自有貞茅茨  
已就治春畦復深耕蔬食聊自足萬事取不盈

謫居

并序

余謫居揭陽官舍幽清庭有盆魚有竹石楹前  
榴花灼灼不絕樹間小鳥交交弄語長至後謝  
病杜門益無往來終日靜坐讀易誦詩月明靜  
夜活火焚香援琴小弄意興既極恬然而卧益

從容乎樂也賦詩志之

自昔悲羈旅局促亦奚為  
昭曠苟在懷憑運與委蛇  
嶺海何必惡四時有丹萸  
我生一甲子即事多所怡  
華館絕塵氛水木澹幽姿  
好鳥時一鳴靜蘊流天機  
縱心八極外欽之在幾微  
歷覽千古書此理不吾欺  
被服誠無斃真賞欣自知  
持此以永念可用忘棲遲  
自非高堂戀鹿門乃在茲

庚戌春月坡初成



浩浩月初上一坡正受之以我無營心當此獨坐時為  
籌世中事無樂可代茲長林寒颶息春風藹如斯萬族  
各萌動我心豈不知俯視方輿靜仰觀圓象馳靈襟既  
無際一形安足私持以畀大鈞榮悴非所思

遊鴈蕩山

昔我愛丘山名勝在夢想去去三十年塵事空鞅掌茲  
遊愜始願千里遂獨往望山屢馳騫入谷轉疑恍仰  
觀秋瀑飛俯聽潭流響陽崖峙雄突陰洞藏竒敞幽

尋碧澗底遐矚紫霄上春風蕩輕陰百里見開朗青丹  
未可圖文翰誰能髣髴心願止託回首空悵快勝地古  
今存浮生俄頃賞安得結茅廬於此日偃仰

湖上

道人不識憂墮然罕所慮胸中有竒懷常得山水助時  
乘酒半醺或值寐初寤獨往恣幽尋欣若有所遇有時  
深林行穿徑忽失路有時湖上還看雲忘所務凝目孤  
鳶歸傾耳細泉注所造趣未極原陸任昏暮非關耽清

娛曾是乘遠慕閒心始造理快意多失步嗟爾行人  
迫迫焉所赴

喜雨

六月旱既甚雨來亦不遲即看雲漠漠已覺黍離離興  
劇惟需酒歡多且賦詩明朝應積水相與向東菑

引泉

次第竹根瀉相將得到家鳥啼春雨後流出滿山花

偶成

春來勝事逐時新  
早起風光倍可親  
忽見青天垂柳綠  
此時愛殺樹邊身

馮從吾一首

從吾字仲好長安人萬曆己丑進士改庶吉士  
授山西道御史歷官副都御史謚恭定有少墟

集

戊申暮春講學太華山中

嘉會來喬嶽良朋喜共游  
白雲時去住野鳥亦夷猶  
雨

霽千峰翠春深萬木稠山靈真有待吾道重千秋

林堯俞 十一首

堯俞字咨伯莆田人萬曆己丑進士改庶吉士

除檢討累官太子太保禮部尚書謚文簡有谿

堂集

何穉孝云先生歷官大宗伯牴牾權閹不能久安其位歸一歲而遂卒其詩溫潤典

則瀏麗輕颺見若甚易而不知其磨錯之難卑不可抑高不可亢淺而有章深而不窮斯太和

之元音也

詩話陳文定善書嘗以南祭酒奏績之京王振致酒幣請書程子四箴文定書與之而却其幣

論者魁之七友蒲田林嘉璣字衡者述其從祖  
文簡公亦善書法魏忠賢敦請不與忠賢矯詔  
命公題扁公大書畏天堂三字題曰禮部尚書  
某奉旨書時忠賢出餅啗公云出手製公以南  
人不慣食麩餅忠賢方銜之公遽請歸里陛見  
德陵謂曰長尚書乃欲歸邪賜之蟒玉以公儀  
表頡而長也若兩公者明哲保身淵然不可犯  
士大夫當以為師林子又言公五言律原出右  
丞誦谿堂集信  
衡者不我送也

三月三日棠林修楔

良辰維上已選勝遵水側灌木翳繁陰原疇免登陟長  
川羨游鱗高雲睇歸翼羽觴催莫停陽烏漸西匿

七里灘作

雙笳引綵舟鳴榔下建德既經漁浦口還望定山色沿  
流苦奔峭入峽驚偏仄寓目恣游觀舉趾罷登陟一醉  
嚴陵祠清風邈難即如何謝人徒於馬解徽纆

聞黔中平志喜

皇風式九圍聲教暨邊鄙由來西南夷難用漢法理其  
居雜編氓其道羈縻耳撫馭乖所宜騷擾孰為弭黔本  
隸鬼方滇蜀相脣齒各自有君長號令亦齊止昨者糾

諸樊西川亂無紀况乃安奢酋水蘭負堅壘目覩貴陽  
城疊糧同折箠我軍寡且弱日夕呼庚癸相距及歲餘  
如肉置諸几疾聲望外援割髮而啞指幸然掠兵至背  
城判一死又逢賊氣惰乍合便披靡既以解重圍亦足  
療瘡痛雖未極兵威庶幾褫不軌斯維社稷靈人力詎  
至此但此全城功僉云李與史願懷往事虞勿生戰勝  
喜如聞老鴉闕去城僅五里

出黃河



纔過長淮口已見清河縣黃流昔瀕洞茲馬東如箭更  
值凍初開盞來冰數片量水僅尺餘輕舸常患買酒  
澆龍神冀得南風便挂席就中央免入盤渦漩咫尺到  
黃樓役夫辭帶絳

海東晚眺

暮春命巾車言憇青溪溪徘徊芳樹林夕陽已在水東  
望窮扶桑波濤盪地紀日月互吐吞雲霞幻竒詭天吳  
晝不發珠母宵疑徙島嶼急樓船春疇間耒耜鯨浪幾

時平漁歌處處起

夏日集高梁寺

一徑隔流水沿洄到寺門  
瓢分香積供榻借給孤園  
山雨來花氣松風斷鳥言  
淹留未遽返暝色下高原

楓亭即事

落日楓亭驛秋風荔子園  
人烟山外盡漁榜夜深喧  
地迴潮當寺僧閒月到門  
羣賢方豎義吾意已忘言

山行

肩輿纔出郭倚杖即看山  
霜葉暗樵路寒花悽客顏  
石門通鶴柵松嶺入雲關  
去去紅塵隔鳴禽時往還

立秋

苦積連旬雨况驚一葉秋  
亂雲低復合大火暗潛流  
商意迴蘋末笳聲到枕頭  
寧須感搖落不斷是邊愁

送海印住華嚴寺

雞足峰前寺相違知幾年  
山僧今易主舊路尚依然  
地遠黃茅瘴池分玉澗泉  
時來訪靈澈一榻伴雲眠

送陳汝鑑大行入京

是日為三月三日  
集棠林曲水

共來修禊事及此送君行  
花雨林間散蘋風池上輕  
酒攜何次道歌借米嘉榮  
解作陽關疊休賡第四聲

陸彥章 一首

彥章初名彥璋字伯達松江華亭人萬曆己丑  
進士繇行人累官南京刑部侍郎

歸次廬龍

帝城東抱海山重迢遞單車出萬峯  
秋色長風吹白一作

塞  
鴈歸心落日下盧龍

傅新德 二首

新德字元明定襄人萬曆己丑進士改庶吉士  
除檢討歷官國子監祭酒贈禮部右侍郎謚文  
恪有集

送郭青字參藩巴蜀

殊方幾載歎離羣忽漫相逢又送君  
萬里江湖龍劍合  
一尊風雨薊門分  
峨岷迴出天連雪  
棧閣平臨馬度雲

蜀相威名應不負他時消息好相聞

送董兵備衡水

帝城南望楚江開  
捧檄人看日下來  
萬里春光明使節  
千年王氣接金臺  
雲連湘浦雙星度  
天盡衡陽一鴈迴  
今日長沙同內地  
逢時翻羨洛陽材

馮有經一首

有經字正子錦衣衛籍慈谿人萬曆己丑進士  
改庶吉士授編修歷中允諭德掌司經局轉庶

子後贈禮部侍郎

登嘉禧寺

高樓切天浮古木森在下峰峰開金碧四十二蘭若芳  
林擁桃李怪石帖松檟人語曠不喧啼鳥無冬夏對此  
懷巖耕局促何為者

黃輝一首

輝字昭素一字平倩南克人萬歷己丑進士改  
庶吉士除編修歷中允諭德庶子少詹事兼侍

讀學士有怡春堂集

詩話平情盛有詩名而諸體未遒所謂似是而非者

別汝鈍

使者分歧路迢迢越五谿一為孤鳳唱無復冷猿啼

方大鎮一首

大鎮字君靜桐城人萬曆己丑進士除大名推官擢江西道御史遷大理寺丞歷左少卿有方

大理集



詩話少卿與邵忠介馮恭定高忠憲顧端文諸  
公講學首善書院書院毀篁得同人于野遂乞  
休自號野同翁年七十廬母墓而終鄉人私謚  
曰文孝先生其歲杪聞召詩云仕途百折如浮  
海客邸孤蹤似出家足以占所守矣

塗太僕揆宇先生滇中寄書附答

白雲迢遞點蒼居十載關心萬里餘枕上西風孤客夢  
天涯北鴈數行書黃花並憶漳河賦綠酒相從上谷車  
夷蹠報施無定論燕山迷望轉踟蹰

陳所蘊 二首

所蘊字子有上海人萬曆己丑進士除刑部主  
事歷員外郎中調南文選司出為湖廣參政仕  
至南太僕少卿致仕有竹素堂正續集

嘉善寺石壁

出郭探幽竒驅車詣長薄禪林一片石絕壁聳虛壑既  
疑巨靈擘復類鬼斧鑿俯臨百仞崖飛度千尋閣斗酒  
此盤桓與子聊斟酌人生會有盡奈何苦羈縛願言解  
徽纆負耒采靈藥

得家報家園小山已成

小築堪招隱新成曲水潯此時頻夢寐何日遂登臨但  
有風塵色空懸江海心故人相問訊應笑未抽簪

徐應簧

六首

應簧字軒卿淳安人萬曆己丑進士官至參政  
有鳳谷集

遠別

荒郊微雨歇一夜生秋草曉起望行塵離愁滿懷抱渺

渺孤帆影迢迢萬里道回首故鄉心憑誰共顛倒人生  
衣食足在家貧亦好榮枯代相嬗賢聖莫能保昨日東  
隣花今朝淨如埽

山中雜詠二首

流水看不厭况蕪溪上山倚闌終日坐紅葉擁柴關  
欲訪南鄰居遙遙在何處隔浦見晴沙江村從此去

春夜夢吳心淵文學

昨夜從君歌竹枝醒來不記曲中詞徘徊獨望西冷岸

正是潮平月落時

晚春

曉起扶筇步水涯  
綠楊烟裏酒旗斜  
春來愁殺連纖雨  
纔見開花又落花

幽居

陽翟幽居好  
納涼兩間草屋  
一株桑十年不出  
籬門外  
誰識人間杜五郎

戈用泰 一首

用泰字來陽平湖人萬歷己丑進士授涑水知  
縣升南京刑部主事歷郎中有適適軒集

烟雨樓

平波四面八牕開盡日笙歌載酒來去矣詩人誰管領

年年烟雨自樓臺

樓為太守  
龔公勉建

郝敬一首

敬字仲輿京山人萬歷己丑進士知縉雲永嘉

二縣擢禮科給事中謫宜興縣丞再知江陰縣

稍遷行人司副有山草堂嘯歌

王百穀云仲與詩削去雕鏤組

續獨寫性靈

詩話仲與難經  
伉伉詩非所擅

### 讀春秋

五霸亂王章春秋實經始邦國有遺文修緝人臣禮筆  
削非新義興亡沿舊史直道在人心毀譽吾何事後儒  
謾壽張紛紛凡例起穿鑿隻字間褒貶悉由已匹夫為  
素王何以懲賊子惟有孟氏言庶得遺經旨

章士雅 三首

士雅字循之常熟人萬曆己丑進士除嘉善知縣入為刑部主事改南工部有薄游小詠

湖上曲

白蓮花開秋水生  
蘭橈桂楫羅衣輕  
郎君試看花深處  
兩兩鴛鴦飛不去

天雄道中

天雄自昔推雄鎮  
鎖鑰於今重北門  
河近白溝人不渡



關連紫塞戍常屯重陰卷雪冰還合朔氣吹沙日易昏  
極目荒原無匹馬車輪何事促王孫

暮秋經舊游有感

傷心客子來還去况是重逢秋色殘落葉又從孤館聽  
青山不似故鄉看頻年馬足征夫老此夕雞鳴去路難  
猶憶驛門衰柳樹一枝曾是舊時攀


朱家相一首

家相字良輔侯官人萬曆己丑進士除江陰知

縣調揭陽再調長興

送馮南雍量移德清尹

炎海憐孤憤臨溪喜量移才非黃綬吏望重白雲司桂  
杻渺然去春江空所思雲霄飛鳥近遮莫數歸期



明詩綜卷六十